



Lëtzebuerg, den 30. Abrëll 2026

*I - Intégration étrangers*

## MOTIOUN

D'Chamber vun den Deputéierten:

stellt fest, datt:

- am Kontext vun engem séieren demographesche Wandel de Wonsch an der Bevëlkerung grouss ass, Lëtzebuergesch als Nationalsprooch weider ze stäerken an am Alldag méi sichtbar ze maachen;
- d'Lëtzebuergeschen Sprooch eng zentral Roll als Identitéits- an Integratiounssprooch spillt;
- Lëtzebuerg schonn eng Rei vu Moosnamen a Strukturen huet, déi d'Promotioun an d'Benotze vun der Lëtzebuergeschen Sprooch ënnerstëtzen, dës awer weider kënnen ausgebaut a besser koordinéiert ginn;

ass sech bewosst, datt:

- Lëtzebuerg op eng equilibréiert Approche tëscht Lëtzebuergesch, Franséisch an Däitsch an der Administratioun an am Alldag ugewisen ass;
- d'Stärke vum Lëtzebuergeschen an der ëffentlecher Funktioun nëmmen no an no an ënner Berécksiichtigung vun der funktioneller Machbarkeet ëmgesat ka ginn;
- d'Integratioun vu Sproochkompetenzen am Bildungssystem an an der beruflecher Praxis eng laangfristeg Aufgab ass, déi koordinéiert Mesuren erfuerdert;

fuerdert d'Regierung op:

- eng national Strategie zur weiderer Stäerkerung vun der Lëtzebuergeschen Sprooch auszubauen oder unzepassen, déi konkret Ziler an Etappen definéiert fir d'Verbredung an d'Visibilitéit vum Lëtzebuergeschen an der Verwaltung, am ëffentleche Raum an an der Gesellschaft;

- d'Benotzung vum Lëtzebuergeschen an der staatlecher Kommunikatioun progressiv ze stäerken, notamment duerch eng systematesch Prioriséierung vun der Lëtzebuenger Versioun bei Standardinformatiounen, ënner Berécksiichtegung vun der praktescher Ëmsetzbarkeit;
- d'Méiglechkeeten ze analyséieren, wéi Lëtzebuergesch graduell méi staark an der juristescher Praxis agesat ka ginn, inklusiv d'Bewäertung vun net-verbindlechen Iwwersetzungen vu wichtegen Texter als éischte Schratt;
- d'Roll vum Lëtzebuergeschen an de Schoulen ze stäerken, notamment duerch eng weider Integratioun als Unterrechts- a Kommunikatiounssprooch am Fundamental, begleet vun evaluéierte Pilotprojeten;
- Initiativen z'ënnerstëtzen, déi d'Benotze vum Lëtzebuergeschen an internationale Schoulen a Privatschoulen encouragéieren, ouni d'Schoulautonomie a bestoend Curricula a Fro ze stellen;
- d'Sproocheförderung am Lëtzebuergeschen an der fréikandlecher Bildung (Crèchen, Spillschoul) weider auszubauen, mat engem Fokus op d'Stärke vum Lëtzebuergeschen;
- d'Offer u Sproochen- a Kulturcoursë fir Erwuessener weider ze stäerken an ze differenzéieren, fir d'Integratioun an d'Participatioun um gesellschaftleche Liewen ze erliichteren;
- zousätzlech Campagnen a konkret Ureizer ze entwéckelen, fir d'Léieren an d'Benotze vum Lëtzebuergesche bei net-lëtzebuergesche Matbierger ze fërderen;
- bannent engem realisteschem Zäitraum e Plang virzestellen, wéi d'Sproochkompetenzen am Gesondheits- a Flegesecteur weider gestärkt kënne ginn, inklusiv praktesch Ëmsetzungsmoosnamen fir Personal mat Patientekontakt;
- d'Chamber reegelméisseg iwwer d'Weiderentwécklung vun dese Moosnamen z'informéieren, notamment iwwer Fortschrëtter, Evaluatiounen an nei Initiativen am Beräich vun der Lëtzebuenger Sproochepolitik.



Fred Keup